

একটি বিভ্রাট অপনোদন

অনেকেই বলে থাকেন যে, শবে বরাতের কথা ক্বোরআন বা হাদীছে নেই। আসলে এ কথাটি পুরোপুরি সঠিক নয়। “শবে বরাত” দু’টি ফারসী শব্দ মিলে গঠিত একটি বাক্য। ক্বোরআন ও ছুন্নাহ্‌র ভাষা যেহেতু ‘আরাবী তাই তাতে এই ফারসী শব্দ দু’টি না থাকাই স্বাভাবিক। কিন্তু এর অর্থ এই নয় যে, শবে বরাতের অর্থ এবং এর বিষয়বস্তু ক্বোরআন ও ছুন্নাহ্‌তে নেই। অবশ্যই আছে। কেননা শব্দ অর্থ হলো “রাত” এর ‘আরাবী হলো- “লাইলাতুন” আর বরাত অর্থ হলো “ভাগ, অংশ, হিস্যা, নির্দেশ বা সিদ্ধান্ত” এর ‘আরাবী হলো “ক্বাদর”। তাহলে শবে বরাতের ‘আরাবী অনুবাদ হলো- লাইলাতুল ক্বাদর।’

যেহেতু অর্থগত দিক থেকে শবে বরাতই হলো লাইলাতুল ক্বাদর, আর লাইলাতুল ক্বাদরই হলো শবে বরাত, সুতরাং এই দৃষ্টিকোণ থেকে স্বীকার করতেই হয় যে, শবে বরাতের কথা ক্বোরআন ও হাদীছে রয়েছে। ছুরা আদদুখান এবং ছুরা আলক্বাদর-এ এই রাতের কথাই বলা হয়েছে। তাছাড়া শবে বরাত তথা লাইলাতুল ক্বাদরকে অন্বেষণ করার বিষয়ে এবং এ রাতের ফাযীলাত বিষয়ে অনেক বিশুদ্ধ হাদীছ বর্ণিত রয়েছে।

শবে বরাতের ন্যায় লাইলাতুল বারাত সম্পর্কেও অনেকে বলে থাকেন যে, ক্বোরআন বা ছুন্নাহ্‌তে এর অস্তিত্ব নেই। তাদের এ কথাটি আংশিক সঠিক তবে পুরোপুরি সঠিক নয়। কেননা “লাইলাতুন” শব্দের অর্থ হলো রাত, আর “বারাতুন” শব্দের অর্থ হলো মুক্তি বা সম্পর্কচ্ছেদ। “লাইলাতুল বারাতুন” অর্থ হলো, মুক্তি বা সম্পর্কচ্ছেদের রাত্রি। আর যেহেতু একাধিক গ্রহণযোগ্য হাদীছে বর্ণিত রয়েছে যে, লাইলাতুন নিস্ ফি মিন শা‘বান বা অর্ধ শা‘বানের রাত্রি হলো গোনাহ্‌ থেকে মুক্তি ও নিষ্কৃতি লাভের এবং যাবতীয় অসৎকর্মের সাথে সম্পর্কচ্ছেদের রাত্রি, তাই অর্থগত দিক থেকে অর্ধ শা‘বানের রাত্রিই (১৪ই শা‘বান দিবাগত রাত) হলো লাইলাতুল বারাতুন এবং এর উল্লেখ হাদীছে রয়েছে।

এই আলোচনা ও বিশ্লেষণ থেকে এ বিষয়টিও পরিষ্কার যে, শবে বরাত ও লাইলাতুল বারাতুন এক বিষয় নয়। শবে বরাত লাইলাতুল বারাতুন নয় এবং লাইলাতুল বারাতুন শবে বরাত নয়। বরং শবে বরাত হলো শবে ক্বাদর এবং লাইলাতুল বারাতুন হলো লাইলাতুন নিস্ ফি মিন শা‘বান। (আল্লাহ ﷻ-ই সর্বাধিক জ্ঞাত)